

आकाशवाणी

खबरां ---

1. अपने “मन की बात” कार्यक्रम च प्रधानमंत्री नरेंद्र मोदी होरें आखेआ जे पहलगाम आतंकवादी हमला आतंकवाद दे आकाएं दी कायरता ते हताशा गी दर्शादा ऐ।
2. गृह मंत्रालय दे आदेश मगरा एनआईए नै पहलगाम आतंकी हमले दी जांच दी जिम्मेदारी लैती।
3. उत्तराखंड सरकार नै सालाना चार धाम ते हेमकुंठ साहेब यात्रा लेई पंजीकरण करवाई चुके दे 77 पाकिस्तानी बसनीकें दा पंजीकरण रद्द कीता।
4. केंद्री सेहत मंत्री जे.पी नड्डा होरें आखेआ ऐ जे Cancer दे इलाज च भारत मते इलाज मुआलजे केंद्रें दी स्थापना गी तवज्जो दिंदे होई बड्डी गैंइयां पुट्टा’रदा ऐ।
5. बिहार च बौद्ध भिक्षुएं तरफा मधुबनी पेंटिंग ते सिंगिंग बाउल असेंबल दी बक्ख-बक्ख श्रेणिएं च 2 गिनीज विश्व रिकार्ड बनाए।

<><><><><><>

PM-Mann ki Baat

प्रधानमंत्री नरेन्द्र मोदी होरें अज्ज मन की बात कार्यक्रम राएं लोकें कन्नै अपने बचार सांझा कीते। अपने संबोधन च उनें पहलगाम आतंकी हमले दा जिक्र कीता। इस बारे बोलदे होई उनें आखेआ जे भारत दे लोकें च जेहड़ा आक्रोश ऐ, ओह आक्रोश पूरी दुनिया च ऐ। इस आतंकी हमले दे मगरा लगातार दुनिया भरै थमां संवेदना जाह्न कीतियां जा’रदियां ना। प्रधानमंत्री होरें आखेआ जे 22 अप्रैल गी पहलगाम च होए दे आतंकी हमले नै मुखे दे हर नागरिक गी दुखी कीता ऐ। पीड़ित परोआरें प्रति

हर भारतीय दी डूहंगी ते गैहरी संवदेना ऐ। बेशक ओहू कुसै बी राज्य दा होए, कोई बी भाशा बोलदा होए, पर ओहू उनें लोकें दा दर्द मसूस करा'रदा ऐ, जिनें इस हमले च अपने गी गोआया ऐ। प्रधानमंत्री होरें आखेआ जे इस हमले बारे उनेंगी ग्लोबल लीडर आस्सेआ फोन कीते गे, चिट्ठियां लिखियां, सनेह भेजे। इस खतरनाक तरीक कन्नै कीते गेदे आतंकी हमले दी सारें सख्त लफ्जें कन्नै निंदेया होआ'रदी ऐ। उनें मारे गेदे लोकें दे परोआरें आलें प्रति संवेदना जाह्न कीतियां।

पूरी दुनिया आतंकवाद खलाफ साढ़ी लड़ाई च 140 करोड़ भारतीय कन्ने खड़ोती दी ऐ। उनें पीड़ित परोआरें गी परतियै भरोसा दोआया जे उनेंगी न्याहू थ्होग। न्याहू पक्क गै हासल होग। इस हमले दे दोशिएं गी करारा जवाब दित्ता जाग। प्रधानमंत्री होरें अंतरिक्ष शक्ति बारे बी गल्ल कीती। उनें आखेआ जे अज्ज भारत पूरी दुनिया च खल्ला आले क्षेत्र च शक्ति बनी चुके दा ऐ। भारत नै किट्टे 104 उपग्रहें दा प्रक्षेपण करियै रिकार्ड बनाया ऐ।

अस चन्द्रमा दे दक्खनी ध्रुव पर पुज्जने आले पैहले मुलख बनी चुके दा ऐ। भारत अज्ज इस दुनिया च सब्बने थमां मता कास्ट अफैक्टिव सफल स्पेस प्रोग्राम दी अगुवाई करा'रदा ऐ। दुनिया दे केई मुलख अपने उपग्रह ते स्पेस मिशन आस्तै इसरो दी मदद लेंदे न। हुन भारत नै अपने अंतरिक्ष क्षेत्र गी नीति सेक्टर लेई बी खोली दित्ता ऐ। अज्ज मते सारे नोजवान अंतरिक्ष सेक्टर च कम्म करा'रदे न। 10 ब'रें पैहले इस क्षेत्र च छड़ी इक कंपनी ही पर अज्ज मुलख च सवा 3 सौ थमां मते स्पेस स्टार्टअप कम्म करा'रदे न। अपने अज्ज आले संबोधन च उनें महान साईंसदान डॉ. के.कस्तुरीरगन जी हुंदी बी गल्ल कीती ते 5 दिन पैहले काल होई गेआ हा।

अपने अज्ज आले कार्यक्रम च उनें एक पेड़ मां के नाम अभियान दी बी गल्ल कीती। उनें आखेआ ते साढ़े मुलख दी सब्बने थमां बड़ी ताकत साढ़े 140 करोड़ नागरिक न। उंदा समर्थ उंदी इच्छेआ शक्ति ऐ ते

जिसलै करोड़ां बद्धे लोक किठे कुसै अभियान कन्नै जुड़ी जंदे न तां ओहदा खासा असर होंदा ऐ। एहदी इक मिसाल ऐ एक पेड़ मां के नाम अभियान, एहू अभियान, उस मां दे नां ऐ जिनें असेंगी जन्म दित्ता ते उस धरती मां आस्तै बी जेहड़ी असेंगी अपनी गोदी च लेइयै रखदी ऐ। 5 जून गी विश्व पर्यावरण दिवस पर इस अभियान दा इक ब'रा पूरा होआ'रदा ऐ।

<><><><><><>

Kulgam Terror Associates

सेना, सीआरपीएफ ते कुलगाम पुलस आस्सेआ सांझे अभियान दुरान आतंकवादिएं दे 2 सहायकें गी गिरफ्तार कीता गेआ ते उंदे कब्जे थमां असला बरूद बरामद होआ ऐ। दौनें दी पंछान बिलाल अहमद भट्ट ते मोहम्मद इस्माइल भट्ट दे तौर पर होई ऐ, दवै थोकरपोरा दे रौहने आले न। तपाशी दुरान असला बरूद, जेहदे च 2 पस्तोलां, पस्तोल दे 25 रौंद, पस्तोल दियां 2 मैगजीनां उंदे कब्जे थमां बरामद होइयां। सरबंधी दफाएं तैह्त्त उंदे खलाफ पुलस स्टेशन कार्डमो च मामला दर्ज कीता गेआ ऐ ते अगड़ी जांच कीती जा'रदी ऐ।

<><><><><><>

NIA-Takes Over

गृह मंत्रालय दे हुक्मै मूजब राश्ट्रीय जांच एजेंसी एन.आई.ए नै पहलगाम आतंकी हमले दी जांच गी अपने हत्थै च लेई लैता ऐ। इस हमले गी आतंकवादियें 22 अप्रैल गी अंजाम दित्ता हा जेदे च 25 सैलानी ते इक मुकामी बसनीक मारेआ गेआ हा। एनआईए दी टीम नै अपनी जांच गी तेज करी दित्ता ऐ ते मौका-ए-वारदात आहली थाहरै थमां सबूत किठे कीते जा'रदे न। एहदे अलावा चश्मदीदें थमां बी पुच्छ-पड़ताल कीती जा'रदी ऐ तां जे इस हमले दे दोषियें गी तौले शा तौले फगड़ेआ जाई सकै।

फारेंसिक माहिर बी जांच च जुटी गेन तां जे आतंकवादियें गी तौले गै उन्दे अंजाम तगर पुजाया जाई सकै।

<><><><><><>

Char Dham Pak

उत्तराखंड सरकार नै सलाना चार धाम ते हेमकुंठ साहिब दी जात्तरा आस्तै 77 पाकिसतानी नागरिकें दा पंजीकरण रद्द करी दित्ता ऐ। एहू फैसला राज्य पर्यटन ते संस्कृति मंत्री सतपाल महाजन हुंदी तरफा घोषित कीता गेआ। उनें आखेआ जे सैलसफा ते आतंकवाद कन्नै-कन्नै नेई चली सकदे। उनें दोहराया जे राज्य सरकार यात्रुएं दी सुविधा लेई यात्रा गी शांतिपूर्ण तरीके कराने आस्तै बचने बज्झी दी ऐ। मंत्री महाजन होरें पक्का कीता जे चार धाम जात्तरा दी तैयारियां पूरी कीतियां जाई चुकी दियां न।

<><><><><><>

Fake-Message

सरकार नै आखेआ ऐ जे इक वट्सऐप मैसेज बक्ख-बक्ख Social Media plateforms उप्पर फैलाया जा रदा ऐ जे दावा कीता जा रदा ऐ जे सरकार नै भारतीय सेना दे आधुनिकीकरण आस्तै बैंक अकाउंट खोलेआ ऐ ते एहू मैसेज गुमराह करा रदा ऐ। ऐसा नेई ऐ। प्रेस इंफारमेशन ब्यूरो दे तथ्यें दी जांच आहली इकाई नै दस्सेआ ऐ जे वट्सऐप मैसेज झूठा ऐ। उनें आखेआ जे सरकार नै **Armed forces battle casualties welfare fund (AFBCWF)** बनाया ऐ तां जे देश आस्तै जान मुहाने आहले सैनिकें दे परौआरें गी तुरत माली मदद दित्ती जाई सकै। इस फंड दा इस्तेमाल जंग च मारे गेदे परौआरें दे कल्याण आस्तै कीता जंदा ऐ ना के हथियार खरीदने जां आधुनिकीकरण आस्तै।

<><><><><><>

Maha-Nadda

केंद्री सेहत मंत्री जे.पी नड्डा होरें अज्ज आखेआ ऐ जे भारत कैंसर दे इलाज आस्तै बड्डी गैइयां पुट्टा'रदी ऐ जेदे हेठ बड्डे पैमाने पर कैंसर इलाज केंद्र स्थापित करना ते इसी बिमारी दा जल्द पता चलने आस्तै तंत्र गी मजबूत करना ऐ। मंत्री होरें Medical journal 'the lancet' दी रिपोर्ट दा हवाला दित्ता जेदे च आखेआ गेआ ऐ जे सरकार दी कोशिशें कन्नै भारत च 90 फीसदी कैंसर मरीज बिमारी दा पता लगाने दे 30 दिनें दे अंदर गै इलाज शुरू करा रदे ना। नड्डा होरें Expanded Cancer Institute दे शुभारम्भ दे मौके बोला रदे हे। इस मौके महाराष्ट्र दे छत्रपति सभाजीनगर च सरकारी कैंसर अस्पताल च अज्जै-कल्लै दी तकनीकें कन्नै बनाया गेदा True Beam Unit दी बी शुरूआत कीती गई।

<><><><><><>

Handicraft-Awards

कपड़ा मंत्रालय दे दस्तकारिएं सरबन्धी विभाग दे विकास कमिशनर हुं'दे दफ्तरै बड्डी मती प्रतिश्ठा आहले राश्ट्री दस्तकारी अवार्ड 2024 लेई आवेदन मंगे ना। 30एं ब'रें तगर दी उम्री दे कारीगर ते घट्टोघट्ट 10एं ब'रें दे तजुर्बे आहले एहदे शा मती उम्री दे कारीगर बी इस राश्ट्री अवार्ड लेई आवेदन करी सकदे ना। इसै चालली 20एं ब'रें तगर दे तजुर्बे आहले ओकडे कारीगर जिं'दी उम्र 50एं ब'रें शा मती ऐ, ओहू शिल्प गुरू अवार्ड लेई आवेदन करी सकदे ना। मंत्रालय आसेआ कुल 25 पुरस्कार भेंट कीते जाडन जिं'दे चा 6 शिल्प गुरू अवार्ड ते 19 राश्ट्री अवार्ड होडन। आवेदन जमा करोआने दी खीरी तरीक 12 मई ऐ। इच्छुक कारीगर, एहदे लेई अखनूर रोड जम्मू च स्थित हैंडीक्राफ्ट सर्विस सेंटर कन्नै राबता करी सकदे न जां फ्ही वैबसाईट www.handicrafts.gov.in पर जाइयै मती

जानकारी लेई सकदे ना। योग्यता मानदंड, दिशा निर्देश ते होर दुए ब्यौरे इस वैबसाईट उप्पर उपलब्ध ना।

<><><><><><>

VP-Agriculture University

उपराश्ट्रपति जगदीप धनखड़ होरें आखेआ जे सरकार नै प्रधानमंत्री नरेंद्र मोदी हुंदी सरपरस्ती च करसानें ते राई-बाई गी मजबूत बनाने गी म्हेशा प्राथमिकता दिती ऐ। तमिल नाडू एग्रीकल्चर यूनिवर्सिटी च अज्ज बोलदे होई उपराश्ट्रपति होरें आखेआ जे करसान समुदाय दी बेहतरी आस्तै कई कल्याण योजनां शुरू कीतियां गेइयां ना। प्रधानमंत्री किसान योजना दा लाहू सिद्धे करसानें गी पुज्जारदा ऐ। उनें जोड़ेआ जे 2047 तोड़ी 30 ट्रिलियन डालर दी अर्थ बवस्था बनने आस्तै हर इक खेत्तर च आर्थिक बदलाव लेयाने दी जरूरत ऐ। उनें कार्पोरेट्स गी अपील कीती जे ओहू राई-बाई सरबन्धत गतिविधिएं च निवेश करन। एहदे शा पेहले उपराश्ट्रपति होरें ते उंदी घरै आहली नै “एक पेड़ मां के नाम” मुहिम तैहत बूहटे लाए।

<><><><><><>

Bihar-World Record

बिहार च बौद्ध भिक्षुएं तरफा मधुबनी पेंटिंग ते सिंगिंग बाउल असेंबल दी बक्ख-बक्ख श्रेणिएं च 2 गिनीज विश्व रिकार्ड बनाए गे। गिनीज विश्व रिकार्ड दे अधिकारिएं अज्ज पटना दे पाटलीपुत्र स्पोर्ट्स कम्प्लेक्स च मुखमन्त्री नितीश कुमार होरें गी प्रमाण पत्र सौंपे। मुखमन्त्री होरें बिहार च 4 मई थमां 15 मई तोड़ी आयोजित होने आहले 15 मई तोड़ी आयोजित होने आहले खेलो इंडिया यूथ गेम्स दी तैयारिएं दी बी समीक्षा कीती। पदमश्री जगदम्बा देवी होरें गी श्रद्धांजलि देने आस्तै प्रसिद्ध कलाकार बउआ देवी ते दुएं दे मार्गदर्शन च मधुबनी पेंटिंग संस्थान च 18.6-9 वर्ग मीटर दी इक बड्डी मधुबनी पेंटिंग बनाई गेई। दुई उपलब्धि च बक्ख-बक्ख मठें थमां आने आहले ते 5 साल थमां 70 साल दी उम्र

दे 375 भिक्षु कल शामी बोधगया च कटे होए ते सिंगिंग बाउल असेंबल आस्तै बौद्ध भिक्षुएं दी सब्बनें शा बड़ी सभा दा रिकार्ड बनाया।

<><><><><><>

NHW

जम्मू-श्रीनगर राश्ट्रीय जरनैली शिड़क एन.एच-44 अज्ज दिन भर शिड़कै दी मरम्मत ते इसी चैड़ा करने दे कम्मं दे मद्देनजर गड्डियें दी आओजाई लेई बंद रेई ते एह कल बडुलै 8 बजे तगर बंद रौहगा। पिछले दिनें रामबन च आए दे हाड़ ते शिड़ा पर पस्सियां ते कुप्पड़ पौने करी इसी बड़ा मता नुकसान पुज्जा ऐ। एहदे चलने गै जरनैली शिड़का पर गड्डियें दी आओजाई गी बंद रक्खेआ गेआ तांजे मरम्मत ते शिड़कै गी चैड़ा करने दे कम्म बेल्लै सिर पूरे होई जान। रामबन जिला कमिशनर आसेआ एहू निर्देश दित्ते गे हे ते यात्रुएं गी सलाह दित्ती गेई ऐ जे इस बेल्लै ओहू एन.एच-44 पर सफर करने थमां परहेज करन।

<><><><><><>

LG-Special Session

उपराज्यपाल मनोज सिन्हा होरें कल 29 अप्रैल गी जम्मू कश्मीर विधानसभा दा इक दिने लेई इक विशेष इजलास सद्देआ ऐ जेहड़ा पिछले दिने पहलगाम च होए दे आतंकी हमले बारे चर्चा करने लेई ऐ जेहदे च 25 सैलानी ते इक मकामी बसनीक मारेया गेआ हा, इस विशेष इजलास लेई गुजारश 23 अप्रैल गी मुख्मन्त्री उमर अब्दुल्ला हुंदी अध्यक्षता च लग्गी दी कैबिनेट दी बैठका च कीती गेई ही। विधानसभा दी इस विशेष बैठका च आतंकी हमले च मारे गेदें गी श्रद्धांजलि दित्ती जाग, हमले बारे चर्चा कीती जाग ते इस सरबंधी होरने विशें पर बी गल्लबात कीती जाग। एहदे इलावा इस जालमाना कारवाई दी सख्ती नै निंदेया करदे होई इक प्रस्ताहू बी पास कीता जाग। विधानसभा दा एहदे शा पिछला इजलास “बजट सत्र” हा जेहड़ा 9 अप्रैल गी खत्म होआ हा।

<><><><><><>

Ex Vice Army Chief

सेना नै साबका उपप्रमुख ते Bombay Sappers दे कर्नल कमांडेंट Lt. Gen. S. Pattabhiraman हुंदा कल सेना अस्पताल Wellington च काल होई गेआ। ओहू 78 बरें दे हे। साहू लैने च तकलीफ दे चलदे ओहू पिछले किश दिनें दे अस्पताल च दाखल हे। अज्ज पूरे सैन्य सम्मान कन्नै उंदा अंतिम संस्कार कीता गेआ।

<><><><><><>

IPL

अज्ज आई.पी.एल टी-20 क्रिकेट दे दुए मैच च दिल्ली कैपिटल्स दा मुकाबला रायल चैलेंजर्स बेंगलुरु कन्नै दिल्ली दे अरूण जेटली स्टेडियम च होग। एहू मैच अज्ज शामी साहु 7 बजे शुरू होग। 8 मैचें चा 12 अंके कन्नै दिल्ली कैपिटल्स दुए ते 9 मैचें चा 12 अंके कन्नै रायल चैलेंजर्स बेंगलुरु त्री थाहर पर ऐ।

<><><><><><>